



Na osnovu člana 8 Zakona o Službenom glasniku Brčko distrikta BiH („Službeni glasnik Brčko distrikta BiH“ brojevi 1/00 i 17/04) i Odluke o davanju ovlaštenja Zakonodavnoj komisiji Skupštine Brčko distrikta BiH broj 01-02-218/17 od 13. 9. 2017. godine, Zakonodavna komisija Skupštine Brčko distrikta BiH na 35. sjednici održanoj 21. 2. 2018. godine utvrdila je prečišćeni tekst Zakona o poslanicima u Skupštini Brčko distriktu BiH („Službeni glasnik Brčko distrikta BiH“ broj 29/04) sa izmjenama i dopunama Zakona o poslanicima u Skupštini Brčko distriktu BiH („Službeni glasnik Brčko distrikta BiH“ brojevi: 19/07, 2/08, 17/08, 1/09, 27/14 i 52/17).

Broj: 01.3.-05-229/18
Brčko, 21. 2. 2018. godine

**PREDSJEDAVALAČI
ZAKONODAVNE KOMISIJE**
Ljubiša Lukić, s. r.

**ZAKON
O POSLANICIMA SKUPŠTINE
BRČKO DISTRIKTA BOSNE I HERCEGOVINE
(PREČIŠĆENI TEKST)**

I. OPĆE ODREDBE

**Član 1
Svrha**

Ovim zakonom uređuju se osnovi kojima se poslanici rukovode prilikom ostvarivanja prava i izvršenja dužnosti u Skupštini Brčko distrikta Bosne i Hercegovine (u daljem tekstu: Skupština).

**Član 2
Obavljanje nadležnosti**

Poslanici će obavljati svoje nadležnosti u skladu sa Statutom Brčko distrikta Bosne i Hercegovine, ovim zakonom, Zakonom o sukobu interesa u institucijama Brčko distrikta Bosne i Hercegovine, Poslovníkom Skupštine Brčko distrikta Bosne i Hercegovine.

**Član 3
Slobodni mandat**

- (1) Poslanici su predstavnici svih građana Brčko distrikta Bosne i Hercegovine. Oni su slobodni i nezavisni u vršenju mandata.
- (2) Poslanici stupaju na dužnost po polaganju zakletve na konstitutivnoj sjednici Skupštine, koju saziva predsjednik, odnosno potpredsjednik Skupštine ranijeg saziva (ukoliko predsjednik Skupštine ranijeg saziva nije ponovo izabran za poslanika), u roku od dvije (2) sedmice od potvrđivanja izbornih rezultata.
- (3) Predsjednika i potpredsjednika Skupštine poslanici biraju na način koji je propisan članom 29 Statuta Brčko distrikta Bosne i Hercegovine (u daljem tekstu: Statut).

Član 4

- (1) Naredbe i uputstva nisu obavezujući za poslanika, on se rukovodi samo sopstvenom savješću.
- (2) Mandat pripada poslaniku, a ne političkoj stranci, koaliciji ili listi nezavisnih kandidata koja ga je kandidovala na listi kandidata.
- (3) Dogovori koji se odnose na davanje ostavke na mandat poslanika prije ili tokom skupštinskog mandata biće ništavni.

Član 5 Izvršenje mandata

- (1) Poslanici će svoje mandate izvršavati individualno i nezavisno.
- (2) Dogovori koji se odnose na način izvršenja mandata biće ništavni.

Član 6 Zabrana diskriminacije

- (1) Poslanici neće biti izvrgnuti diskriminaciji zbog kandidature za mjesto poslanika, dobijanja mandata i izvršenja mandata.
- (2) Neće biti diskriminacije na radnom mjestu: poslanici neće dobiti otkaz s radnog mjesta zbog kandidature na mjesto poslanika, dobijanja mandata i izvršenja mandata.
- (3) Izuzetno od prethodnog stava, radno pravni status lica zaposlenih u organima javne uprave i institucijama Brčko distrikta BiH, nakon kandidovanja, dobijanje mandata i izvršenje mandata poslanika, regulisat će se u skladu sa odredbama Zakona o državnoj službi u organima javne uprave Brčko distrikta BiH.
- (4) Poslanici imaju pravo na slobodno vrijeme neophodno za izvršenje njihovog mandata.

II. POSLANIČKI IMUNITET, USKRAĆIVANJE DOKAZA, PRAVO NA INFORMISANOST, PRAVO NA PREDLAGANJE, POSLANIČKI KLUBOVI

Član 7 Imunitet

- (1) Poslanici neće biti krivično ili građanski odgovorni za bilo koju radnju izvršenu u okviru njihovih dužnosti u Skupštini.
- (2) Poslanici se mogu pozvati na imunitet u rokovima i na način kako je to predviđeno Statutom i Zakonom o imunitetu, za radnje izvršene u okviru njihovih dužnosti, ali se on ne može smatrati opštom preprekom za krivično gonjenje ili pokretanje parničnog postupka za radnje koje se ne odnose ili ne proizlaze direktno iz njihovih dužnosti.
- (3) U smislu ovog zakona “radnje izvršene u okviru njihovih dužnosti” podrazumijevaju radnje koje se odnose ili koje direktno proističu iz dužnosti koju poslanici imaju u Skupštini, kako je to utvrđeno u Statutu, zakonima i drugim propisima Brčko distrikta.

Član 8 Uskraćivanje dokaza

Poslanik u svako doba ima pravo da odbije da objelodani dokaz o licima koja su mu povjerila činjenice ili kojima je poslanik povjerio činjenice koje su vezane za izvršenje njegovog mandata.

Član 9 **Oduzimanje i traženje**

- (1) U skladu s pravom poslanika da odbije da da dokaze, samo uz saglasnost Skupštine može se izdati naredba da se oduzmu dokumenti ili elektronski zapisi poslanika, pretresu poslanici lično ili njihove kancelarije i stambeni prostori ili oduzme prepiska i prisluškiju telefonski razgovori.
- (2) Mjere navedene u stavu 1, ili korišćenje dokumentacije koja je ranije oduzeta, biće zabranjene u slučaju da Skupština nije dala saglasnost.

Član 10 **Pravo na informisanost**

- (1) Poslanik ima pravo da bude redovno i na vrijeme informisan o radu Skupštine, komisija, Vlade i uprave Brčko distrikta, kao i o svim drugim pitanjima koja su od važnosti za obavljanje njegove funkcije.
- (2) Tražena informacija ili izvještaj dostaviće se poslaniku u najkraćem mogućem vremenskom periodu, ali ne kasnije od 15 dana od dana prijema zahtjeva.

Član 11 **Pravo na predlaganje**

Svaki poslanik ima pravo da predloži predloge zakonskih akata u skladu s nadležnostima Skupštine.

Član 12 **Poslanički klubovi**

Dva ili više poslanika mogu da oforme poslanički klub u cilju koordinisanja svoga učešća u radu Skupštine.

III. NOVČANE NAKNADE

Član 13 **Novčana naknada**

- (1) Poslanici imaju pravo na odgovarajuću novčanu naknadu u cilju podržavanja svoje nezavisnosti.
- (2) Iznos mjesečne novčane naknade poslanika će biti procentualni odnos između bruto novčane naknade predsjednika Skupštine i bruto novčane naknade poslanika zatečen na dan stupanja na snagu ovog zakona, a osnovica za obračun će biti bruto novčana naknada predsjednika Skupštine propisana stavom 3 ovog člana.
- (3) Predsjednik Skupštine ima pravo na mjesečnu bruto novčanu naknadu u sumi koja će iznositi 100% mjesečne bruto plate gradonačelnika Brčko distrikta.
- (4) Iznos novčane naknade potpredsjednika Skupštine će biti procentualni odnos između novčane naknade predsjednika i potpredsjednika Skupštine zatečen na dan stupanja na snagu ovog zakona, a osnovica za obračun će biti bruto novčana naknada predsjednika Skupštine propisana paragrafom 3 ovog člana.
- (5) Predsjednici komisija imaju pravo, uz novčanu naknadu, na dodatnu novčanu nadoknadu od 5% mjesečno, na mjesečnu novčanu naknadu propisanu stavom 2 ovog člana.

(6) Novčana naknada iz stavova 2-4 ovog člana podliježe porezu na dohodak.

(7) U skladu sa odredbama stavova 2–5 ovog člana, visina novčane naknade predsjednika, potpredsjednika i poslanika Skupštine utvrđuje se rješenjem koje donosi radno tijelo propisano poslovnikom o radu Skupštine, a ona se isplaćuje mjesečno unazad.

Član 14 **Naknada određenih materijalnih troškova i druge naknade**

Članovi imaju pravo na nadoknadu svih materijalnih troškova koji su nastali kao rezultat obavljanja funkcije i druge naknade koje se isplaćuju iz fonda materijalnih troškova Skupštine, pod uslovima i iznosima propisanim za službenike i namještenike uprave Brčko distrikta Bosne i Hercegovine.

Član 15 **Prelazna novčana naknada**

(1) Na kraju svog mandata u Skupštini poslanici imaju pravo na prelaznu novčanu naknadu, pod uslovom da su u Skupštini proveli najmanje jednu (1) godinu.

(2) Prelazna novčana naknada će biti jednakog iznosa kao novčana naknada iz člana 13 stavovi 2, 3 i 4 ovog zakona.

(3) Period isplaćivanja prelazne novčane naknade će biti tri (3) mjeseca i počinje nakon mjeseca u kojem se mandat završio. Period isplaćivanja će se nastaviti po jedan mjesec za svaku punu godinu obavljanja dužnosti poslanika u Skupštini nakon isteka jedne pune godine.

(4) Ostvarivanje ovog prava će prestati na kraju onog mjeseca u kojem je bivši poslanik primio platu za svoj rad ili ostvario pravo na penziju.

(5) U slučaju smrti bivšeg poslanika novčana naknada u prelaznom periodu će posljednji put biti isplaćena za mjesec u toku kojeg je bivši poslanik preminuo.

(6) Za ovu novčanu naknadu primjenjuje se član 13 stav 5 ovog zakona.

IV. PENZIONO I ZDRAVSTVENO OSIGURANJE

Član 16

Skupština uplaćuje doprinose za penziona i zdravstveno osiguranje iz budžeta Brčko distrikta za one poslanike koji nemaju doprinose uplaćene na osnovu drugog zaposlenja.

Član 16a **(Profesionalizacija mandata)**

(1) Poslanici koji ostvaruju prvo iz člana 16 ovog zakona mogu podnijeti zahtjev za profesionalizaciju mandata poslanika u Skupštini Brčko distrikta BiH.

(2) O utvrđivanju i prestanku statusa profesionalnog poslanika iz stava 1 ovog člana odlučuje rješenjem Komisija za upravu i finansije Skupštine Brčko distrikta BiH, a ukoliko nije formirana o zahtjevu odlučuje predsjedavajući konstitutivne sjednice Skupštine ili predsjednik Skupštine.

(3) Poslanici kojima je utvrđen status profesionalnog poslanika su u profesionalnom radnom odnosu u Skupštini Brčko distrikta BiH.

(4) Status profesionalnog poslanika prestaje utvrđivanjem prestanka prava iz člana 16 ovog zakona.

Član 17

Doprinosi se izračunavaju na osnovu novčane naknade iz člana 13 stava 2 ovog zakona u skladu s važećim propisima i odobravaju se u okviru godišnjeg budžeta Skupštine.

V. PRELAZNE I ZAVRŠNE ODREDBE

Član 18

Poslanik koji obavlja svoj mandat u vrijeme kada ovaj zakon stupi na snagu ima pravo na prelaznu novčanu naknadu na kraju mandata u skladu s članom 15 ovog zakona.

Član 19

Zakon o poslanicima Skupštine Brčko distrikta BiH stupio je na snagu 7. septembra 2004. godine, a njegove izmjene i dopune 17. jula 2007. godine, 20. februara 2008. godine, 21. maja 2008. godine, 30. decembra 2008. godine, 12. jula 2014. godine i 30. decembra 2017. godine.